

2 CORINTIOS

Pablo Corinto marãrẽ õãdoredea

¹ Yũ Pablo, marĩyagũ Timoteo merã musã Marĩpũyarã Corinto marãrẽ, irasũ ããrĩmakũ ããrĩpererã Acaya nikũgue ããrĩrãrẽ õãdoredea. Marĩpũ gããmederosũta Jesucristo yare ãgũyare buedoregũ pĩmi. ² Marĩpũ ããrĩnĩgũ, marĩ Opũ Jesucristo musãrẽ õãrõ iritamu, siuñajãrĩ merã ããrĩrikũmakũ iriburo.

Pablo ãgũ ñerõ tarideare gojadea

³ Marĩpũ, marĩ Opũ Jesucristo Pagũ marĩrẽ bopoñarĩ merã ããmi. ãgũ sugũta marĩrẽ gũñaturamakũ irigũ ããrĩmi. Irasirirã ãgũrẽ: “Õãtaria mũ”, ãrĩ, usũyari sĩrã! ⁴ Marĩ ñerõ taririkũ, Marĩpũ marĩrẽ gũñaturamakũ yãmi. Irasirirã gajerã ñerõ tarimakũ ããrã, Marĩpũ marĩrẽ gũñaturamakũ iriderosũ marĩde ãgũsãrẽ gũñaturamakũ irimasĩa. ⁵ Marĩde Cristoyãrã ããrĩsĩa, ãgũ ñerõ tariderosũ bure ñerõ taria. Marĩ ñerõ tariro nemorõ Marĩpũ Cristo merã marĩrẽ iritamugũ õãrõ gũñaturamakũ irigũkumi. ⁶ Gũa Marĩpũ musãrẽ taurire gũñaturaburo, ããrã, ñerõ taria. Gũa ñerõ tarimakũ, Marĩpũ gũare iritamumi gũñaturari merã tariburo, ããrĩgũ. Musã, gũa irirosũ ñerõ tarimakũ, Marĩpũ musãdere iritamumasĩmi gũñaturari merã tariburo, ããrĩgũ. ⁷ Gũa ire masĩa. Gũa ñerõ tarirosũ musãde gũa merã ñerõ taria. Irasũ ñerõ tarimakũ, Marĩpũ gũare gũñaturamakũ

irirosũ musãdere õãrõ gãñaturamakũ yámi. Irasirirã musã gãñaturari merã ñerõ tariburire gũa masĩa.

⁸ Gũayarã, Asia nikũgue gũare waadeare musãrẽ masĩmakũ gããmea. Gũa iroguere ããrĩrã bũro ñerõ tarirã: “I ñerõ taririre neõ bokatĩũbirikoa. Boarãkoa. ⁹ Wẽjẽbéokõãrãkuma”, ãrĩ gãñadibũ. Marĩpũ direta gũa gãñaturaburire irasũ ñerõ taribũ. Irasirirã: “Marĩ basi neõ iritamumasĩbirikoa. Marĩpũ boanerãrẽ masũgũ sugũta marĩrẽ taumasĩmi”, ãrĩ gãñaturabũ. ¹⁰ Gũare bũro wẽjẽdũakerepũrũ, Marĩpũ gũare taumi. Irasirirã: “Daporadere, pũrũguedere taugũkumi”, ãrĩ bũremua. ¹¹ Irasirirã musã gajerã merã Marĩpũre gũaya ããrĩburire sãrẽbosarosũta ãgũ gũare iritamumakũ ããrã, wãrã ãgũrẽ: “Pablosãrẽ õãrõ iritamubũ”, ãrĩ, usũyari sãrãkuma.

Pablo ãgũ Corintogue waadũadideare gojadea

¹² Gũa irideare gãñarã, usũyari merã ãsũ ãrĩ gãñãa: “Gũa i ãmũguere Marĩpũ ãũrõ ãrĩgatori marĩrõ gopeyari merã masakare buebũ”, ãrĩ gãñãa. Musãdere irasũta iribũ. Gũa masĩrĩ merã buebiribũ. Marĩpũ gũare maĩgũ ãgũ turari merã iritamumi. ¹³ Gũa musãrẽ gojarã, pẽmasĩma õãrõ dita gojabũ, õãrõ pẽmasĩmakũ gããmerã. ¹⁴ Irasirirã gũa musãrẽ gãñarã: “Gũayamarẽ ãgũsã pẽmasĩturabirideare pũrũgue õãrõ pẽmasĩrãkuma”, ãrĩ gãñãa. Irasirirã, marĩ Opũ Jesús dupaturi aarimakũ, gũa musã iridea merã usũyarosũta, musãde gũa iridea merã usũyarãkoa.

¹⁵⁻¹⁶ Irasũ ãrĩ gãñagũ, Macedonia nikũgue waagũ musãrẽ ããgũ waapũroridũadibũ. Irasirigũ musãrẽ ããtariwãgã, gãme dujari, musãrẽ dupaturi

ĩábokuyo. Pea yũre mũsã ĩãrĩ merã ɯɯyamakũ iridũagũ, irasiridũadibũ. Mũsã, irasirimakũ, yũ Judea nikũgue waaburire iritamubokuyo. ¹⁷ “Yũ mũsã pũro waagũra”, ãrĩkeregũ, ejabirimakũ ĩãrã: “Pablo, gajerã masaka ĩgũsã gããmerõ irirosũ iriañumi”, ¿ãrĩ gũñarĩ? “Ĩgũ ãrĩderosũ iribirañumi”, ¿ãrĩ gũñarĩ? ¹⁸ Marĩpũ ĩgũ: “Ãsũ irigũra”, ãrĩdeare yámi. Gũade: “Ãsũ irirãkoa”, ãrĩdeare: “Iribirikoa” ãrĩrã meta yáa. Irire masĩmi Marĩpũ. ¹⁹ Yũ, Silvano, irasũ ããrĩmakũ Timoteo, Marĩpũ magũ Jesucristoyare mũsãrẽ werebũ. Marĩpũ: “Yũ magũ merã ãsũ irigũra”, ãrĩgũ, diayeta irigũno ããrĩmi. “Ĩgũ merã ãsũ irigũra”, ãrĩ, pũrũ: “Iribirikoa”, ãrĩgũ meta yámi. ²⁰ Irasirigũ ããrĩpereri Marĩpũ masakare: “Ãsũ irigũra”, ãrĩdeare Jesucristo ĩgũ magũ merã iripeokõadi ããrĩmi. ĩgũ irasirimakũ ĩãrã, marĩ Jesucristoyarã Marĩpũre: “Irasũta ããrã, mũ magũ Jesucristo merã iridea õãtaria”, ãrĩ, ɯɯyari sĩa. ²¹ Gũare, irasũ ããrĩmakũ mũsãdere Cristore piriro marĩõ bũremurã, ĩgũ merã õãrõ ããrĩmakũ irigũ, Marĩpũta ããrĩmi. ĩgũta marĩrẽ beyepĩdi ããrĩmi Cristoyarã ããrĩdoregũ. ²² Irasirigũ marĩrẽ ĩgũyarã ããrĩrĩrẽ masĩmakũ iridoregũ, Õãgũ deyomarĩgũrẽ marĩ merã ããrĩmakũ iridi ããrĩmi. Irasirigũ ããrĩpereri ĩgũ marĩrẽ sĩburire ĩgũ merã masĩmakũ yámi.

²³ Marĩpũ yũ wererire, yũ gũñarĩrẽ masĩmi. Irasirigũ yũ mũsã pũroguere Corintoguere waabirideare diayeta weregũra. Mũsã ñerõ iridea waja turidũabi, mũsã pũroguere waabiribũ, mũsãrẽ bũjaweremakũ iribokoa, ãrĩgũ. ²⁴ Gũa mũsãrẽ bũro

doreri merã: “Jesucristore buremurã ãsũpero gapu iriro gãamea”, ãrĩrã meta ããrã. Piro marĩrõ musã ãgãrẽ õãrõ buremua. Irasirirã, musãrẽ ãgũ merã nemorõ usuyamakũ gããmerã, õãrõ iritamudãã.

2

¹ Iro dupuyuro yu musãrẽ ããgũ ejagu, yu wereri merã musãrẽ bujaweremakũ iribu. Irasirigu: “ ‘Dupaturi ãgũsãrẽ bujaweremakũ iribokoa’, ãrĩgũ, daporare ãgũsãrẽ ããgũ waabea”, ãrĩ gũñabu. ² Musãrẽ bujaweremakũ irigu, yude bujawerebokoa. Marĩ basi gãme bujaweremakũ irirã, gãme usuyamakũ irimasĩña marĩbokoa. ³ Irasirigu irinugue musãrẽ su pũ gojabu yu musã pãrogue waaburi dupuyuro iririre amudoregu. Irire amuburi dupuyuro yu musãrẽ ããgũ waamakũ, yure usuyamakũ iriboanerã, yure bujaweremakũ iribokoa. Yu ãsũ ãrĩ gũñãã: Yu musã merã usuyamakũ, musãde yu merã usuyarãkoa. Irasirigu musã merã bujaweredãabi: “Waabea dapa”, ãrĩ gojabu. ⁴ Musãrẽ irire gojagu, buro gũñarĩkuri merã, õãrõ yujupũrãkuri marĩrõ merã, buro oreri merã musãrẽ gojabu. Musãrẽ bujawereburo, ãrĩgũ meta gojabu. Yu musãrẽ buro marĩrẽ masĩmakũ iridãagu, gojabu.

Ñerõ iridi irideare kãtika! ãrĩ gojãdea

⁵ Sugu musãyagu ãgũ ñerõ iridea merã yure bujaweremakũ irimi. Yu direta irasũ iribirimi. Musãdere ããrĩpererãrẽ bujaweremakũ iridi ããrĩmĩ. ãgũ yure musã nemorõ bujaweremakũ irikerepũgu: “ãgũrẽ buro wajamoãka!” ãrĩgũ

meta yáa. ⁶ Musã nerēnarōgue: “Īgũ ñerō irideare waja marĩ merã neō nerēnemobirikōãburo”, ãrĩdeare irisiayuro. Irasirigũ yũ musãrē: “Iropãta ĩgũrē wajamoãka!” ãrĩ gojáa. ⁷ Īgũ ñerō irideare bujawerekeregu, ĩgũrē musã wajamoãnemomakũ, buro bujawereri merã dujabokumi. Irasirĩã ĩgũ ñerō irideare kãti, ĩgũrē iritamuka, gũñaturari merã ããrĩburo, ãrĩrã! ⁸ Irasirigũ yũ musãrē: “Dupaturi ĩgũrē òãrō bokatĩrĩñeãka, musã dupuyurogue maĩderosũta ĩgũrē maĩrĩrē masĩburo, ãrĩrã!” ãrĩ gojáa. ⁹ Iro dupuyuro musãrē gojagu: “¿Diyeta yũ dorerire irirãkuri?” ãrĩ masĩduagu gojabũ. ¹⁰ Musã ĩgũ ñerō irideare kãtirosũta, yũde irire kãtia. Yũre ñerō iribirikerepũ, musãrē iritamudũagu: “Īgũ ñerō irideare kãtia. Cristo marĩ ñerō irideare kãtigũ ĩũrō, irasũ yáa”, ãrĩ gojáa. ¹¹ Marĩ ĩgũ ñerō irideare kãtimakũ ĩãgũ, wãtẽa opu Satanás marĩrē ñerō iridoredũagu marĩrē tarinũgãmasĩbirikumi. Īgũ marĩrē ñerĩ irimakũ gããmerĩrē òãrō masĩa.

Pablo: “Troague ããrĩgũ gũñarikũbũ”, ãrĩ gojadea

¹² Yũ Troas wãĩkuri makãgue Jesucristoya kerere buegu ejamakũ, marĩ Opu Jesucristo wãrã iroque ããrĩrãrē iri kerere pẽduamakũ iridi ããrĩmĩ. ¹³ Irasũ ããrĩkerepũ, marĩyagu Titore bokabirisĩã, buro bujawere gũñarikũbũ. Irasirigũ iro marãrē: “Waagũ yáa”, ãrĩ, Macedonia nikũgue ĩgũrē ãmagũ waabu.

Cristoyarã wãtĩ ñerō iridorerire tarinũgãmasĩma, ãrĩ gojadea

¹⁴ Yũ gũñarikũkeregu, Marĩpũre: “Mũ yũre òãrō iritamunĩa”, ãrĩ, usũyari sĩa. Marĩ Jesucristoyarã

ããrĩmakũ, Marĩpũ marĩrẽ ãgũ iritamurĩ merã
ããrĩpereri wãtĩ ñerõ iridorerire tarinũgãmasĩmakũ
yãmi. Marĩ Jesucristoya kerere bueri merã
masakare ãgũyamarẽ masĩmakũ yãmi. Sũrõrĩ
ããrĩpererogue sũrõ seyaro irirosũ ããrĩpererogue
marãrẽ masĩmakũ yãmi. ¹⁵ ãsũ ããrã. Marĩpũ, marĩ
Jesucristoya kerere were, ãgũyare iritayamakũ
ĩãgũ, õãrĩ sũrõrĩ ãgũrẽ sĩdea soemurĩ merã
ũũyarusũ, marĩ merã ũũyami. Sũrõrĩrẽ ãgũ ãũrõ
soemumakũ sũrõ seyarusũ, marĩ noó waaró marĩ
Jesucristoyarã ããrĩrĩrẽ ãgũ taumurãrẽ, peamegue
waamurãdere masĩmakũ yãmi. ¹⁶ Peamegue
waamurã Jesucristoya kerere marĩ weremakũ
pãrã, ãgũrẽ gããmebiri waja irogue wajamoãsũburire
masĩma. Jesucristo taumurã gapũ iri kerere
marĩ weremakũ pé bũremurã, Marĩpũ pũro ãgũ
merã ããrĩburire masĩma. Marĩ basi iri kerere
õãrõ weremasĩbea. Marĩpũ iritamurĩ merã irire
õãrõ weremasĩa. ¹⁷ Wãrã gajerã Marĩpũyare
buegorenarã, niyeru direta wajatadũama. Gũa
gapũ ãgũsã irirosũ iribeã. Gũa Cristore moãboerã,
Marĩpũ iriunerã ãgũ ãũrõ ãgũ weredoredeare
gopepyari merã wereã.

3

*Marĩpũ Jesucristo iridea merã: “Õãrõ irigũra
mũsãrẽ”, ãrĩrĩrẽ gojadeã*

¹ Gũa mũsãrẽ irire ãrĩrã, dupaturi gũa basi
õãrõ werenĩrã meta yãa. Gajerã buerimasã
mũsã pũro ejaburi dupuyuro ãgũsã buenerãrẽ
su papera pũgue ãgũsã buerire: “Keoro ããrã”,
ãrĩrĩrẽ gojadoreñurã. Irasirirã mũsã pũro

ejarã, iri pũrẽ mũsarẽ wiañurã. Mũsã guare masĩsiãa. Irasirirã gũa ãgũsã irirosũ mũsarẽ iri pũnorẽ iriubea. Irasũ ããrĩmakũ gajerogue buerã waamurã, mũsarẽ iri pũnorẽ gojabosadorebea. ² Gũa iri pũnorẽ gããmebea. Mũsã, gũa Jesucristoya kerere weremakũ pãrã, ãgũrẽ bũremu, ãgũyare irinũgãbũ. Masaka, mũsã irasirimakũ ããrã, gũa buerire: “Keoro ããrã”, ãrĩ masĩrãkuma. Gũade gũa gũñarĩgue mũsarẽ: “Diayeta Jesucristore bũremu, ãgũyare iritũyarã yãma”, ãrĩ masĩa. Mũsã irasiriri merã masaka guare: “Õãgorama”, ãrĩ masĩrãkuma. Gũayamarẽ gojadea pũ merã masĩrõsũ irire masĩrãkuma. ³ Jesucristo, gũa ãgũya kerere weremakũ, mũsarẽ ãgũrẽ bũremu, ãgũyare iritũyamakũ iridi ããrĩmĩ. Irasirirã masaka mũsã ãgũyare iririre ããrã, ãgũyarã mũsã ããrĩrĩrẽ gojadea pũ merã masĩrõsũ masĩrãkuma. Irasirirã mũsã Cristo gojadea pũ irirosũ ããrã. Irire masĩdoregũ, papera pũgue gojadi merã gojabiridi ããrĩmĩ. Marĩpũ okanĩgũ gããmerõsũta Õãgũ deyomarĩgũ turari merã mũsãya gũñarĩgue: “Ãgũ iritamurĩ merã gũa ãsũ ããrĩrikũ”, ãrĩ masĩmakũ yãmi. Irasirigũ, iripoegue Marĩpũ Moisére ãgũ dorerire pídeare ãtã majĩrĩgue gojaderosũ iribiridi ããrĩmĩ.

⁴ Gũa Cristo iritamurĩ merã Marĩpũre gũñaturasĩã, mũsarẽ irire gojãa. ⁵ “Gũa masĩrĩ merã i moãrĩrẽ yãa”, neõ ãrĩmasĩbea. Marĩpũ iritamurĩ merãta Jesucristoya kerere werea. ⁶ Irasirigũ guare iri kerere, ãgũ masakare: “Õãrõ irigũra mũsarẽ”, ãrĩrĩrẽ õãrõ buemakũ yãmi. Iri kere, iripoegue Marĩpũ Moisére ãgũ doreri pídea irirosũ ããrĩbea. Marĩpũ Jesucristo iridea merã, Õãgũ

deyomarĩgũ iritamurĩ merã marĩrẽ ĩgũ merã õãrõ ããrĩmakũ iriri kere ããrã. Neõ sugũ ĩgũ dorerire iripeogũ mámi. Irasirirã marĩ irire iripeobiri waja peamegue waamurã dita ããrĩbokoã. Õãgũ deyomarĩgũ iritamurĩ merãta Marĩpũ merã õãrõ ããrĩmasĩã.

⁷ Marĩpũ Moisére ĩgũ doreri pídeare ütã majĩrĩgue gojagu, ĩgũ ããrĩrõgue gosewasiriri waamakũ iridi ããrĩmĩ. Irasiro Moiséya diapu Marĩpũ gosewasiriri merã kũmijũdero ããrĩbũ. Iri gosewasiriri peredijakerepũ, Israel bumarã ĩgũrẽ ĩãmeétumasĩbirinerã ããrĩmã. Marĩpũ burõ gosewasiriri merã deyoã, Moisére iri doreri pídea ããrĩkerepũ, iri doreri, masakare ĩgũsã irire iripeomasĩbiri waja peamegue waamurã dita ããrĩmakũ iridero ããrĩbũ. ⁸ Irasirigu Marĩpũ iri doreri merã iridea nemorõ, ĩgũ Õãgũ deyomarĩgũ iritamurĩ merã marĩrẽ ĩgũ merã õãrõ ããrĩmakũ iriri õãtaria. ⁹ Marĩpũ, masaka Moisére ĩgũ doreri pídeare iripeobiri waja ĩgũsãrẽ: “Wajamoãgura”, ãrĩkerepũ, õãgoradero ããrĩbũ. Iri nemorõ, Marĩpũ Jesucristo iridea merã marĩrẽ: “Õãrã, waja opamerã ããrĩma”, ãrĩ ĩãrĩ, õãtaria. ¹⁰ Irasiro Marĩpũ Moisére ĩgũ doreri pídea õãrĩ ããrĩkerepũ, Jesucristoya kere gapũ, iri nemorõ õãtaria. Iri kere, iri dorerire ubu ããrĩrĩ dujamakũ yãã. ¹¹ Marĩpũ burõ gosewasiriri merã Moisére ĩgũ dorerire píkerepũ, iri pereburi ããrĩdero ããrĩbũ. Jesucristo ĩgũ iridea merã marĩrẽ tauri kere gapũ õãtaria. Neõ ubu ããrĩrĩ ããrĩbirikoa. Neõ perebirikoa.

¹² Irasirirã gua irire masĩsĩã, güiro marĩrõ merã pémasĩã õãrõ musãrẽ Jesucristoya kerere

werea. ¹³ Iri kere, Marĩpu Moisere ĩgũ doreri pídea perederosũ neõ perebirikoa. Irasirirã gũa iri kerere wererã, Moisés iriderosũ irirã meta yáa. Moisés Marĩpu merã ããrĩdero purũ, ĩgũya diapu Marĩpu gosewasiriri merã kũmijũdero ããrĩbũ. Israel bumarã iri gosewasiriri peredijarire masĩrĩ, ãrĩgũ, ĩgũya diapure surĩro gasiro merã buũadi ããrĩmĩ. ¹⁴ Moisés irasirimakũ, iri gosewasiriri peredijarire masĩbiriderosũ, Marĩpu doreri ĩgũrẽ pídeare: “Ásũ ãrĩduaro irikoa”, ãrĩ pémasĩbirinerã ããrĩmã. Daporaguedere Israel bumarã irire buerã, pémasĩbema dapa. Cristoyarã dita irire pémasĩma. ¹⁵ Daporaguedere Israel bumarã Marĩpu Moisere ĩgũ doreri pídeare buekererã, pémasĩrĩ marĩrõ buema. ¹⁶ Sugũ masakũ marĩ Opũre buremunugãmakũ, marĩ Opũta ĩgũyare pémasĩmakũ yámi. ¹⁷ Marĩ Opũ, Õãgũ deyomarĩgũ merã sugũta ããrĩmi. Irasirirã, Õãgũ deyomarĩgũ marĩ merã ããrĩmakũ: “Marĩpu Moisere ĩgũ doreri pídeare marĩ tarinugãdea waja marĩrẽ wajamoãgukumi”, ãrĩ gũñabea. ¹⁸ Irasirirã marĩ Opũyarã ããrĩsĩã, marĩ Opũ õãtarigu ããrĩrĩrẽ masĩa. Gajerãde marĩ ĩgũyarã ããrĩrĩrẽ masĩma. Irasirigu marĩrẽ ĩgũ õãgũ ããrĩrõsũ ããrĩmakũ gããmegũ, ããrĩpereri marĩ okarinũrĩrẽ gorawayumakũ yámi. Marĩ Opũ, Õãgũ deyomarĩgũ merã sugũta ããrĩmi. ĩgũta marĩrẽ irasũ yámi.

4

¹ Marĩpu guare bopoñarĩ merã ĩãgũ, guare Jesucristoya kerere weremurãrẽ pídi ããrĩmĩ. Irasirirã piriro marĩrõ gũñaturari merã masakare

iri kerere werea. ² G̃ayasĩũrõ iririre, masaka ããberogue ñerĩ iririre doogorãa. Ærĩgatori merã buebea. Marĩp̃ya werenĩrĩrẽ gorawayuro marĩõ buea. Marĩp̃ũrõ diayema ããrĩrĩ direta pẽmasĩma õãrõ masakare werea, ããrĩpererã g̃uare: “Keoro buema”, ãrĩburo, ãrĩrã. ³ Peamegue waamurã dita Marĩp̃ũ Jesucristo iridea merã masakare tauri kerere g̃ua wererire pẽmasĩbema. ⁴ Ægũsã Jesucristore b̃uremubiri waja, wãtĩ i ãmũ marã ñerã opũ Ægũsãrẽ iri õãrĩ kerere pẽmasĩbirimakũ yãmi. Koye ããmerã sããgorire ããmasĩmerã irirosũ ããrĩmakũ yãmi. Irasirirã Cristo õãtarigũ ããrĩrĩrẽ ããmasĩbema. Cristo, Marĩp̃ũ ããrĩrikurire opagũ, Marĩp̃uta ããrĩmi. ⁵ G̃ua Jesucristoya kerere wererã, masaka g̃uare õãrõ gũñaburo, ãrĩrã meta yãa. Ægũsãrẽ: “Jesucristo marĩ Op̃uta ããrĩmi. Ægũrẽta b̃uremurõ gããmea”, ãrĩ werea. G̃uayamarẽ wererã: “Jesús g̃uare maĩgũ Ægũyare weredoredea merã g̃ua m̃usãrẽ moãboerã irirosũ m̃usãrẽ iritamurã yãa”, ãrĩ werea. ⁶ Neõgoraguere ããrĩperero i ãmũgue naĩtĩãrõ ããrĩmakũ, Marĩp̃ũ: “Boyori waaburo”, ãrĩrĩ merãta boyori waamakũ iridi ããrĩmi. Ægũta iriderosũ marĩya gũñarĩgue boyori ããrĩmakũ yãmi. Irasirigũ marĩrẽ Ægũ õãtarigũ ããrĩrĩrẽ masĩmakũ yãmi. Marĩ Jesucristo õãtarigũ ããrĩrĩrẽ masĩrã, Marĩp̃ũ õãtarigũ ããrĩrĩdere masĩa.

Jesucristore b̃uremurã Marĩp̃ũ merã õãrõ ããrĩma, ãrĩ gojadea

⁷ G̃ua Marĩp̃ũ õãtarigũ ããrĩrĩrẽ masĩrã, diarisoro ubu ããrĩrĩ soro, õãtariri opari soro irirosũ ããrã. Irasirirã gajerã, g̃ua Marĩp̃ya kerere weremakũ

pérã: “Marĩpũ turatarigu iritamurĩ merãta marĩrẽ ãgũyare werema ãgũrẽ bũremuburo, ãrĩrã”, ãrĩ gũñarãkuma. ⁸ Gũa noó waaró ñerõ tarikerepũrũ, Marĩpũ iritamumi, gajerã guare ãgũyare wererire pirimakũ iribirikõãburo, ãrĩgũ. Irasirirã: “¿Naásũ waarokuri?” ãrĩ gũñarikũkererã: “Marĩpũ marĩrẽ iritamubirikumi”, ãrĩ gũñabea. ⁹ Gajerã guare ñerõ irikerepũrũ, Marĩpũ guare koregũ neõ béowãgãbemi. ãgũsã guare wẽjẽduarã pámeépikerepũrũ, Marĩpũ ãgũsãrẽ guare wẽjẽdorebemi. ¹⁰⁻¹¹ Jesús i nikũgue ããrĩmakũ, masaka ãgũrẽ wẽjẽma. Irasirirã gũa ãgũyarã ããrĩrĩ waja ããrĩpereri gũa okarinũrĩrẽ ããrĩpererogue gũa noó waaró guadere wẽjẽduama. Marĩpũ gapũ Jesúre dupaturi okamakũ iridi ããrĩmĩ. Irasirigu, gũa boaburi dupare opakerepũrũ, guare Jesús okari sĩrĩrẽ opamakũ yãmi gajerã irire masĩburo, ãrĩgũ. ¹² Irasirirã gũa Jesúya kerere wereri waja gajerã guare wẽjẽma goero ããrĩkerepũrũ, mũsã gapũ iri kerere bũremurã, Marĩpũ pũro perebiri okari opamurã ããrã.

¹³ Marĩpũya werenĩrĩ gojadea pũgue ãsũ ãrĩ gojasũdero ããrĩbú: “Yũ Marĩpũre bũremubũ. Irasirigu ãgũyare werebũ”. Gũade irasũta bũremua. Irasirirã ãgũyare werea. ¹⁴ Ire masĩa. Marĩpũ, marĩ Opũ Jesúre boadiguere masũdi ããrĩmĩ. ãgũrẽ masũderosũta marĩ Jesúyarã ããrĩmakũ, marĩdere masũgũkumi. Irasirigu marĩrẽ ãgũ pũrogue ãĩmarĩagũkumi ãgũ merã ããrĩdoregũ. Gũa irire masĩsĩa, mũsãrẽ ãgũyare werea. ¹⁵ Irasirirã mũsãrẽ iritamuduarã mũsã õãrõ ããrĩburire i ããrĩpererire irirã ñerõ taria. Wárã

gajerädere gwa wererire pérã Marĩpu Jesús merã õãrõ iririre masĩmakũ gããmerã, irasũ yáa. Irire masĩrã, ĩgũrẽ: “Õãtaria mwa”, arĩ, usuyari sĩrãkuma.

¹⁶ Irasirirã gwa ñerõ tarikererã, piriro marĩrõ gũñaturari merã masakare ĩgũyare werea. Ũmurikũ gwaya dupuma turari perewãgãkerekerepu, Marĩpu gware gũñaturamakũ yámi. ¹⁷ Irasirirã gwa Jesúya kerere wereri waja gwa daporare ñerõ taririre, Marĩpu purugue gware iriburire ãsũ arĩ gũñáa: “Marĩ ñerõ tariri, pereburi ããrã. Marĩpu purugue nemorõ õãrĩ iriburi gapu neõ perebirikoa. Buro usuyari merã ĩgũ puro ããrĩnkõãrãkoa”. ¹⁸ Daporare gwa i nikũmarẽ ĩãrĩrẽ gũñarikubea. Ũmugasima ĩãña marĩrĩrẽ, iroque Marĩpu merã ããrĩburire gũñáa. Gwa daporare i nikũmarẽ ĩãrĩ, pereakõãrokoa. Ũmugasima ĩãña marĩrĩ gapu ããrĩnkõãrokoa.

5

¹ Marĩ ire masĩa. Marĩya dupu, marĩya wii irirosũ ããrã. Wii irirosũ marĩya dupu boamakũ, Marĩpu gaji wii marĩrẽ sĩrõsũ gaji dupu ũmugasima dupure sĩgukumi. Iri dupu, masaka iridea dupu meta ããrĩrokoa. Irasiriro neõ boobiri dupu ããrĩrokoa. ² Marĩ i nikũma dupure oparã yujupũrãkaturabiri, bujawereri merã ñerõ taria. Maama wii marĩ õãrõ ããrĩburi wiire buro opaduarosũ, ũmugasima dupure buro gããmea. ³ Surĩro maamañerẽ sãñaduarosũ iri dupure gããmea. Surĩ marĩrã ããrĩduamea irirosũ, dupu marĩrã ããrĩduabea. ⁴ I nikũma dupure oparã yujupũrãkaturabiri, gũñarikũ, ñerõ taria. Ñerõ tarikererã, marĩya

dupu, boaburi dupure béoduarã meta yáa. Maama dupu, neõ boabiri dupu gapure buro opaduaa. Iri dupure oparã, Marĩpu puo igũ merã ããrĩnikõãrãkoa. ⁵ Marĩpu marĩrẽ maama dupure opamurã ããrĩmakũ iridi ããrĩmĩ igũ puo õãrõ ããrĩburo, ãrĩgũ. Marĩrẽ irire masĩburo, ãrĩgũ, Õãgũ deyomarĩgũrẽ marĩ merã ããrĩdoregu sídupuyudi ããrĩmĩ.

⁶ Irasirirã Marĩpure gũñaturaníkõãa. Ire masĩa. Marĩ i nikũma dupukurã, marĩ Opu puo ããrĩbea. ⁷ Ìgũrẽ ããbirikererã: “Diyeta igũ ãrĩderosũta irigukumi”, ãrĩ buremurĩrẽ neõ piribea. ⁸ Gũñaturari merã marĩya ããrĩburire ãsũ ãrĩ gũñãa: “Marĩ boarã, i nikũma dupure béorã, marĩ Opu puo buro usuyari merã ããrĩrãkoa. Irire buro gããmea marĩ”. ⁹ Irasirirã marĩ Opure marĩ merã usuyamakũ iriduarã, i nikũgue ããrĩrã, o igũ puogue ããrĩrã, igũ gããmerĩrẽ iriduaa. ¹⁰ Marĩ Cristo puogue waamakũ, marĩ ããrĩpererãrẽ igũ diaye nidoregukumi marĩ i nikũgue ããrĩrã irideare werebu. Irasirigũ, marĩ õãrĩ irideare, o ñerĩ irideare keoro weregukumi. Marĩ, igũ irasiriburire masĩrã, igũ gããmerĩrẽ iriduaa.

Marĩpu merã õãrõ ããrĩrĩmarẽ gojadea

¹¹ Irasirirã gopeyari merã marĩ Opu Jesu-cristore buremua. Gũa masakare igũsã igũrẽ buremumakũ gããmerã, igũyare werea. Marĩpu gũa iririre masĩmi. Yu, musãdere gũa iririre: “Õãrõ yãma”, ãrĩ masĩmakũ gããmea. ¹² Yu musãrẽ gojagu, dupaturi guayamarẽ: “Õãgorãa”, ãrĩ gojagu meta yáa. Gũare õãrõ masĩ, usuyari merã gũñaburo, ãrĩgũ, musãrẽ gojãa. Gajerã buerimasã:

“Gajerã nemorõ õãrã ããrã”, ãrĩ gũñarã, masaka iũrõ direta õãrã irirosũ ããrĩma. Īgũsã ããrĩrikuri gapure pemasĩbema. Guare: “Keoro buebema”, ãrĩ werewuamakũ, musã Īgũsãrẽ õãrõ yujurãkoa. ¹³ Gajerã gua iririre iãrã: “Niãsũrã yãma”, ãrĩ iãkerepuru, niãsũrã meta yãa. Marĩpu gããmerĩrẽ irirã, irasũ yãa. Pemasĩrĩ merã musãrẽ iritamurã yãa. ¹⁴ Cristo suguta marĩ ããrĩpererãrẽ maĩgũ marĩ ñerĩ iridea waja marĩrẽ boabosadi ããrĩmĩ. Irasirirã marĩ ããrĩpererã Īgũ merã boanerã irirosũ dujabu. Gua irire gũñarã: “Diayeta ããrã”, ãrĩ gũñãa. Irasirirã Īgũyare piriro marĩrõ yãa. ¹⁵ ããrĩpererã marĩ ñerĩ iridea waja marĩrẽ boabosadi ããrĩmĩ, marĩ gããmerõ irinemobirikõãburo, ãrĩgũ. Marĩ õãrõ ããrĩburire marĩrẽ boabosa, masãdi ããrĩmĩ Īgũ gããmerĩrẽ iridoregu. ¹⁶ Irasirirã Īgũrẽ masĩsĩã, i umu marã Īgũrẽ masĩmerã gajerãrẽ werewuari merã iãrã irirosũ neõ iãbea. Iripoeguere yu Īgũrẽ: “Ubu ããrĩgũ, i nikũmũta ããrĩmĩ”, ãrĩ iãunabu. Dapora gapure Īgũrẽ masĩa. ¹⁷ Marĩ Cristoyarã ñajãmakũ, Marĩpu marĩrẽ maama ããrĩrikurire opamakũ iridi ããrĩmĩ. Irasirirã marĩ Īgũyarã ããrĩburi dupuyurogue ããrĩrikũunaderosũ neõ ããrĩbea.

¹⁸ Marĩpu marĩrẽ iri ããrĩpererire irasiridi ããrĩmĩ. Iripoeguere marĩ, Marĩpu merã õãrõ ããrĩbiriunanerã ããrĩbũ. Irasirigu Marĩpu, Cristo boari merã marĩrẽ Īgũ merã õãrõ ããrĩmakũ iridi ããrĩmĩ. ããrĩpererã irasũ ããrĩmakũ gããmegũ, guare Īgũya kerere weredoregu pidi ããrĩmĩ. ¹⁹ Iri kere ãsũ ãrã: “Marĩpu, Cristo boari merã ããrĩpererã i umu marãrẽ Īgũ merã õãrõ ããrĩburire pidi ããrĩmĩ. Īgũsã ñerõ iridea wajare peremakũ iridi

ãārĩmĩ”. Irasirigũ ãārĩpererãrẽ ĩgũ merã õãrõ ãārĩmakũ gããmegũ, gũare iri kerere weredoregũ pídi ãārĩmĩ. ²⁰ Irasirirã Cristore wereboerã ĩgũ iriunerã ããrã. Gũa ĩgũyare wererã, Marĩpũ ĩgũ basi masakare wereboderosũta gũa ĩgũsãrẽ ãsũ ãrĩ werea: “Cristore wereboerã ĩgũyare wererã yãa. Irasirirã mũsãrẽ: ‘Marĩpũ merã õãrõ ãārĩka!’ ” ãrĩ werea. ²¹ Cristo neõ ñerĩ iribirikerepũrũ, Marĩpũ, marĩ ñerĩ iridea waja marĩrẽ wajamoãboderosũ ĩgũrẽ iridi ãārĩmĩ marĩrẽ Cristoyarã ããrĩdoregũ. ĩgũ gããmerõsũta ĩgũ irirosũ marĩrẽ diaye irirã ããrĩdoregũ, irasiridi ãārĩmĩ.

6

¹ Gũa Marĩpũyare moãrã ããrĩsĩã, turaro merã mũsãrẽ: “Marĩpũ Cristo merã mũsãrẽ õãrõ iritamudeare ubu ããrĩrĩrẽ irirosũ ĩãbëobirikõãburo, ãrĩrã, ĩgũyare irinĩkõãka!” ãrĩ werea. ² Marĩpũ ĩgũya werenĩrĩ gojadea pũgue ãsũ ãrĩdi ããrĩmĩ:

Yũ mũsãrẽ: “Õãrõ iritamugũrã”, ãrĩdeare iriripoe ããrĩmakũ, mũsã sërërĩrẽ pébũ. Yũ tau-ripoe ããrĩmakũdere mũsãrẽ iritamubũ, ãrĩdi ããrĩmĩ.✧

Irasirirã gũa wererire õãrõ péka! Daporare masaka Marĩpũre: “Yũre iritamuka!” ãrĩ sërërãrẽ ĩgũ péduaripoe ããrã. Daporare ĩgũrẽ: “Yũre tauka!” ãrĩ sërërãrẽ ĩgũ tauduaripoe ããrã, ãrĩ werea.

³ Gũa Marĩpũyare buerire ñerõ werenĩrĩ, ãrĩrã, gũa neõ sugũnorẽ ñerõ iribea, ĩgũyare piribokumi, ãrĩrã. ⁴ ããrĩpereri gũa iriri merã Marĩpũre moãboerã ããrĩrĩrẽ gajerãrẽ masĩmakũ gããmerã, ãsũ gapũ yãa. ĩgũyare buegorenarã, ñerõ taririre,

✧ 6:2 Is 49.8

gua gããmerĩrẽ opabirire, ñerõ guare waarĩre õãrõ merã gũñatura, bokatĩũa. ⁵ Gajipoere gajerã guare tãrãma. Peresugue biadoboma. Gajipoere wãrã masaka nerẽ, guari merã gainĩma guare wẽjẽduarã. Gajipoere buro poyari merã moãbu. Kãĩrõ marĩrõ, uaboari merã moãbu.

⁶ Gua Marĩpure moãboerã ããrĩrẽ masakare masĩmakũ gããmerã, idere yáa. Īgũsãrẽ Īgũyare buerã, õãrĩ direta iridũari merã, diayema ããrĩrĩ masĩrĩ merã, bopoñarĩ merã, iritamudũari merã, Õãgũ deyomarĩgũ guaguere ããrĩrĩ merã, diaye maĩrĩ merã, ⁷ diayema ããrĩrẽ wereri merã, Marĩpu turari merã buea. Sugũ masakũ Īgũ mojókuri merã Īgũ merã gãmekẽãduagure kãmuta tarinugãgũ irirosũ gua diayema iriri merã ñerĩrẽ kãmuta tarinugãa. ⁸ Gua masakare buemakũ, surãyeri guare buremurĩ merã ããma. Gajerã guare buremubema. Surãyeri guare õãrõ werenĩma. Gajerã guare ñerõ werenĩma. Diayema ããrĩrẽ gua werekereru: “Ārĩgatori merã buema”, ãrĩma. ⁹ Gajerã guare ããmasĩkererã: “Ubu ããrĩrã ããrĩma”, ãrĩsĩã, ããmasĩmerã irirosũ ããma. Gua noó waaró gajerã guare wẽjẽduakereru, okáa dapa. Guare buro wajamoãkererã, wẽjẽbema. ¹⁰ Gua bujawereri merã ããrĩkererã, usuyanĩkõãa. Boporã ããrĩkererã, gua buerire pérãrẽ wajaparire opamakũ irirosũ yáa. Wári i ummarẽ opabirikererã, Marĩpu merã ããrĩpereri õãrĩrẽ opáa.

¹¹ Guayarã Corinto marã, gua musãrẽ gojarã, gua gũñarĩrẽ diayeta gojáa. Musãrẽ gua buro maĩrĩrẽ masĩmakũ gããmea. ¹² Gua musãrẽ maĩrĩrẽ neõ piribea. Musã garũ guare maĩturabea.

13 Irasirigu sugu ĩgũ pũrãrẽ wererosũ, musãrẽ ãsũ ãrĩ weregũra. Yu musãrẽ diaye maĩrõsũta yãdere maĩka!

Marĩpu okanĩgũ marĩ merã ããrĩmi, ãrĩ gojadea

14 Cristore bũremumerã merã sũrosũ ããrĩbirikõãka! Sugũ õãrĩrẽ irigu, ñerĩrẽ irigu merã õãrõ gãmesuribemi. Boyorogue ããrĩrã irirosũ Marĩpũre masĩrã, naĩtĩãrõgue ããrĩrã irirosũ Marĩpũre masĩmerã gãme wapikumasibema.

15 Cristo, wãtẽa opu merã sũrosũ gũñabemi. Cristore bũremugũ, Cristore bũremubi merã sũrosũ gũñarĩrẽ opabemi. 16 Marĩpũre bũremurĩ wii ĩgũ ããrĩrĩ wii, masaka ĩgũsã bũremurĩ keori weadeare pĩburi wii ããrĩbea. Marĩ, Marĩpu okanĩgũya wii irirosũ ããrĩsĩã, ĩgũ direta bũremua. ĩgũya wiigue ããrĩrõsũta marĩ merã ããrĩmi. ĩgũya werenĩrĩ gojadea pũgue irire ãsũ ãrĩ weredi ããrĩmĩ:

Yu ĩgũsã merã ããrĩgũ, ĩgũsã watopegue ããrĩnĩkõãgũkoa. Yu ĩgũsã opu ããrĩgũkoa. ĩgũsã, yaarã ããrĩrãkuma, ãrĩdi ããrĩmĩ.✧

17 Irasirigu marĩ opu ãsũ ãrĩnemodi ããrĩmĩ:

Ñerõ iririkũrãrẽ wapikũnemobirikõãka! ĩgũsã ñerĩ iririre iribirikõãka! ĩgũsã irirosũ ñerĩ iribirimakũ, yũ musãrẽ õãrõ bokatĩrĩñeã, wapikũnĩkõãgũkoa.✧

18 Yu, Musãpu ããrĩgũkoa. Musã yũ pũrã ããrĩrãkoa, ãrĩdi ããrĩmĩ marĩ opu ããrĩpererã nemorõ turagu.✧

✧ 6:16 Lv 26.12; Ez 37.27 ✧ 6:17 Is 52.11 ✧ 6:18 2 S 7.14; 1 Cr 17.13; Is 43.6; Jer 31.9

7

¹ Yaarã yu maĩrã, musãrẽ ire werea. Marĩ, i Marĩpũ arĩdeare pérã, ãarĩpereri ñerõ iririre, ñerĩ gũñarĩdere pĩrirã! Irasirirã goepeyari merã ãgũrẽ burẽmu, ãgũ gããmerĩ direta irinĩrã!

Pablo, Corinto marã gũñarĩ gorawayudeare gojadea

² Gũare maĩka! Gũa musãrẽ neõ poyanorebiribũ. Gũa bueri merã musãrẽ ñerõ irimakũ iribiribũ. Neõ sugũnorẽ musã merãmurẽ arĩgatori merã ãgũyare ãĩabiribũ. ³ Yu irire irasũ arĩgũ: “Musã gũare ñerõ werenĩdea waja opãa”, arĩgũ meta yãa. Gũa musãrẽ burõ maĩrĩ merã gũñanĩa. Yu irire musãrẽ weresiabũ. Irasirirã marĩ okarã, o boarã, suro merãta ãarĩnĩrãkoa. ⁴ Yu, musã õãrõ iriri kerere pégu: “Diayeta yãma”, arĩ gũñãa. Irasirigũ ñerõ tarikeregu, gũñatura, burõ usuyãa.

⁵ Gũa Macedonia nikũgue ejarãgueta neõ siuñajãrĩ bokabiribũ. Noó waaró ñerõ taribũ. Gajerã gũa merã gãme guaseodũama. Musãrẽ gũa buenerãrẽ gũñarã, burõ gũñarikũbũ. ⁶ Marĩpũ, bujawereri merã ãarĩrãrẽ gũñaturamakũ irigũ gapũ Tito gũa pũrogu ejari merã gũare gũñaturamakũ irimi. ⁷ ãgũ gũa pũrogu ejari direta usuyabiribũ. Musã ãgũrẽ gũñaturamakũ irideare ãgũ weremakũ pérã, burõ usuyabũ. Musã yũre ããduarire, musã yũre werewũadeare bujawereri merã ãarĩrĩrẽ, musã yũre gũñarikũrere gũare weremi. Yu irire pégu, burõ usuyanemobũ.

⁸ Yu musã ñerõ irideare musãrẽ gojadupuyudea pũ merã yoaweyaripoe bujaweremakũ iribũ. Irasirigũ: “Yu gojabirimakũ õãboyo”, arĩ gũñabũ.

Irasũ ãrĩ gũñakeregũ, daporare: “Yũ irire gojamakũ òãgorabũ”, ãrĩ gũñáa. ⁹ Irasirigũ daporare usuyagũ, musã bujaweredeare usuyagũ meta yáa. Yũ musãrẽ gojadea pũrẽ buedero purũ, musã ñerõ irideare gũña, Marĩpurũ gããmerõsũta bujawereyuro. Musã gũñarĩrẽ gorawayu, ñerõ iririre piriyo. Iri gapũ yũre usuyamakũ yáa. Musãrẽ bujaweremakũ irikeregũ, neõ poyanorẽbiribũ. ¹⁰ Marĩ ñerõ irideare gũñarã, Marĩpurũ gããmerõsũta bujawere, marĩ gũñarĩrẽ gorawayu, ñerĩ iririre pirirã, peamegue waabonerã tausũrãkoa. Gajerã i ãmũ marã Jesũre buremumerã gapũ ãgũsã ñerõ irideare bujawerekererã, ãgũsã gũñarĩrẽ neõ gorawayubema. Ñerĩ iririre piribema. Irasirirã peamegue waamurã ããrĩma. ¹¹ Musã gapũ musã ñerõ irideare gũñarã, Marĩpurũ gããmerõsũta bujawereyuro. Irasirirã musã iririre gopeyari merã gũñanũgãyo. Musã ñerõ irideare piririre gajerãrẽ buro masĩmakũ gããmeyuro. Musã ñerõ irideare gũñarikũ, buro bujawere, gũiyuro. Irasirirã yũre buro ããdũayuro. Ñerĩ irigũre wajamoãyo, ãgũ ñerõ irideare dupaturi iribirikõãburo, ãrĩrã. ããrĩpereri musã irasiriri merã musã daporare diaye irirã ããrĩrĩrẽ gũare ãmua. ¹² Irasirigũ yũ musãrẽ gojadupuyugũ, ñerõ iridire ãgũ ñerõ irididere iritamudũagũ iribũ. Musãdere iritamubu, iri pũrẽ gojabũ, Marĩpurũ ãũrõ gũare musã òãrõ gũñarĩrẽ masĩburo, ãrĩgũ. ¹³ Irasirirã musã gũare gũñaturamakũ yáa.

Irasũ ããrĩmakũ musã Titore òãrõ bokatĩrĩñeãrã ãgũrẽ usuyamakũ iriyuro. Gũa irire pérã, musã merã usuyadero nemorõ usuyanemobũ.

Musã ĩgũrẽ õãrõ ããrĩrikumakũ iriyuro. ¹⁴ Tito musã pũro waaburi dupuyuro yũ musã merã usũyarire ĩgũrẽ werebũ. ĩgũ iroque ejamakũ, yũ ãrĩderosũta ĩgũrẽ õãrõ iriyuro. Irasirigũ yũ ĩgũrẽ weredeare gũyasĩrĩbea. Gũa musãrẽ diayema ããrĩrĩ diretta wererosũta gũa Titore musãyamarẽ weredeade diayeta ããrĩbũ. ¹⁵ Musã pũroque ĩgũ ejamakũ, ããrĩpererã bũremurĩ merã ĩgũrẽ õãrõ bokatĩrĩneãyuro. Goepeyari merã ĩgũ dorerire iriyuro. Musã irasirideare gũñagũ, musãrẽ maĩdero nemorõ maĩnemomi. ¹⁶ Yũ, musã õãrõ iririre masĩsĩã, “Õãrõ yãma”, ãrĩ, bũro usũyãa.

8

Gajerãrẽ ĩgũsã gããmerĩrẽ sĩburimarẽ gojadea

¹ Gũayarã, gũa musãrẽ ire masĩmakũ gããmea. Marĩpũ Jesũre bũremurĩ buri marãrẽ Macedonia nikũgue ããrĩrãrẽ õãrõ iritamumi. ² ĩgũsã bũro ñerõ tarikererã, gajerãrẽ iritamuma. Bũro bopokererã, ĩgũsãya niyerure maĩrõ marĩrõ, bũro usũyari merã ĩgũsãrẽ sĩburire neeõnama. ³ ĩgũsã gããmerõ ããrĩpereri ĩgũsã sĩrõ bokatĩũrõ sĩkererã, sĩnemonama. Yũ, ĩgũsã irasirideare masĩã. Irasirigũ musãrẽ irire werea. ⁴ Marĩpũyarãrẽ boporãrẽ iritamudũarã, ĩgũsãrẽ sĩdũarire gũare: “Ãĩabosaka!” ãrĩ sẽrẽma. ⁵ Irasũ ãrĩrã, gũa gũñadero nemorõ õãrõ yãma. Niyerure ĩgũsã sĩburire neeõburi dupuyuro marĩ Opũre: “Mu gããmerĩ diretta iridũakoa”, ãrĩma. Pũrũ gũare: “Marĩpũ gããmerõsũta musã dorerire irirãra” ãrĩma. ⁶ ĩgũsã irasirideare ĩãrã, gũa Titore musã pũro Corintogue waadorebũ. Iro dupuyuro musã pũroque ããrĩgũ, boporãrẽ iritamuburire niyerure

sērē, neeõnugãdi ããrĩmĩ. Irasirirã, musã õãrõ irinugãderosũta irire odonúburo, ãrĩrã, ãgũrẽ iriua. ⁷ Musã Marĩpuyare ããrĩpererire õãrõ yáa. ãgũrẽ diayeta buremua. ãgũya kerere ãgũ masĩrĩ sĩrĩ merã keoro buea. ãgũ gããmerõsũta gajerãrẽ õãrõ iritamuduaáa. Gũare bure maĩa. Irasirirã musã i ããrĩpererire õãrõ irirosũta musã boporãrẽ sĩburi neeõrĩdere õãrõ irika!

⁸ Yũ irire musãrẽ irasũ ãrĩgũ, turaro merã: “ãgũsãrẽ niyeru sĩka!” ãrĩgũ meta yáa. Macedonia marã boporãrẽ õãrõ iritamudeare werea, ãgũsã irirosũ musãde diayeta maĩrĩ merã boporãrẽ iritamuduarire masĩduagu. ⁹ Ire musã masĩa. Marĩ Opũ Jesucristo marĩrẽ bure maĩgũ, marĩrẽ õãrõ iritamudi ããrĩmĩ. ããrĩpereri ãmugasiguema õãrĩrẽ opagu ããrĩkeregu, marĩya ããrĩburire i nikũguere aarigũ, bopogu irirosũ aaridi ããrĩmĩ, marĩrẽ ããrĩpereri ãmugasiguema õãrĩrẽ opaburo, ãrĩgũ.

¹⁰ Irasirigu yũ musãrẽ: “Ãsũ irimakũ õãgorabokoa”, ãrĩ gũñarĩrẽ weregura. Musã gapũ si bojori merã gaji makã marã dupuyuro boporãrẽ niyeru sĩburire usuyari merã neeõpũrorisiabu.

¹¹ Irasirirã musã usuyari merã neeõpũroriderosũta daporare sĩyuwarikuka! Wáro oparã, wáro sĩka! MÉRõgã oparã, mÉRõgã sĩka! ¹² Usuyari merã musã sĩduaropã sĩmakũ, Marĩpũ musã merã usuyagukumi. Wáro opamerãrẽ wáro sĩdorebemi.

¹³ Yũ musãrẽ: “Boporãrẽ iritamuka!” ãrĩgũ, “ãgũsã gapũ wáro oparã dujaburo, musã gapũ boporã dujaka!” ãrĩgũ meta yáa. ¹⁴ ããrĩpererã sũrosũ ããrĩrikaburo, ãrĩgũ, irire irasũ ãrã. Daporare musã opari merã ãgũsãrẽ iritamumasĩa. Pũrugue musã

gããmerĩrẽ opabirimakũ, ĩgũsãde mũsãrẽ iritamumasĩrãkuma. Mũsã irasũ gãme sĩrã, mũsã gããmerĩrẽ opapeokõãrãkoa. ¹⁵ Marĩpũya werenĩrĩ gojadea pũgue marĩ gãme sĩrĩrẽ ãsũ ãrĩ gojasũdero ããrĩbũ*: “Wáro opadi gajigũ nemorõ opabirimi. Mérõgã opadide mérõgã opakeregũ, ĩgũ gããmerĩrẽ opapeokõãmi”, ãrĩ gojasũdero ããrĩbũ.

Tito ĩgũ merãmarã merã Corintogue waadea

¹⁶ Yũ mũsãrẽ bũro iritamudũarosũta Marĩpũ Titore mũsãrẽ iritamudũamakũ yámi. Irasirigũ Marĩpũre mũyari sĩa. ¹⁷ Tito, gũa ĩgũrẽ mũsã pũrogue waadoreburi dupuyurogueta mũsãrẽ iritamugũ waadũasiadi ããrĩmĩ. Irasirigũ, gũa ĩgũrẽ waadoremakũ pégu: “Jáũ, waagũra”, ãrĩ yũjũmi.

¹⁸ ĩgũ merã gajigũ marĩyagũre iriua. ããrĩpererogue Jesũre bũremurĩ buri marã ĩgũrẽ: “Marĩpũ masakare Jesucristo iridea merã tauri kerere õãrõ buemi”, ãrĩ werenĩñurã. ¹⁹ ĩgũrẽta beyenerã ããrĩmã, niyerure boporã pũrogue gũa ãĩãmakũ gũare wapikũburo, ãrĩrã. ĩri niyerure mũsã gajerã merã neeõdeare gũa boporãrẽ sĩmakũ ĩãrã: “Marĩ Opũ marĩrẽ õãrõ iritamugũ yámi”, ãrĩrãkuma. Marĩ ĩgũsãrẽ bũro iritamudũarire masĩrãkuma. ²⁰ Gũa iri niyerure wáro mũsã neeõdeare õãrõ kore, boporãrẽ keoro sĩrãkoa, gajerã gũare: “Keoro iribirima”, ãrĩ

* **8:15** Exodo 16.13-18: Iripoegue Israel bumarã masaka marĩrõgue waagorenamakũ, mũmũrikũ Marĩpũ ĩgũsãrẽ manã wãikũri baari sidi ããrĩmĩ. Irasirigũ Marĩpũ dorederosũta Moisés ĩgũsãrẽ irire keoro seadoredi ããrĩmĩ, ĩgũsãkũ ĩgũsã baaburire opaburo, ãrĩgũ.

werewuabirikõãburo, ãrĩrã. ²¹ Guu marĩ Opu iũrõ, masaka iũrõdere diayemarẽ iridũãa.

²² Irasirirã Titosã merã gajigu marĩyagure iriua. Guu, ĩgũ gajerãrẽ õãrõ iritamumakũ wári iãbu. Irasirigu daporare musã gajerãrẽ iritamuduarire pêsĩã, ĩgũ dupuyuro musãrẽ iritamudadero nemorõ iritamugũ waadũami. ²³ Masaka Titoyamarẽ sêrẽñamakũ, ĩgũsãrẽ ãsũ ãrĩ yujuka:

“Pablo merãmu, ĩgũ merã moãgũ ããrĩmi musãrẽ iritamubu”, ãrĩka! Gajerã ĩgũ merã waamurãrẽ sêrẽñamakũ, ãsũ ãrĩka: “Jesúre bũremurĩ buri marã iriuanerã ããrĩma. Cristoyare iriri merã gajerãrẽ Cristore: ‘Õãtarimi’, ãrĩ, usuyari sĩmakũ yãma”, ãrĩka! ²⁴ Irasirirã guu Titosãrẽ: “Corinto marã musãrẽ õãrõ bokatĩrĩñeãrãkuma”, ãrĩ wererosũta õãrõ bokatĩrĩñeãka! Musã irasiririre pãrã, ĩgũsãrẽ iriuanerã musã ĩgũsãrẽ maĩrĩrẽ masĩrãkuma.

9

Jesúre bũremurãrẽ niyeru sĩburi neeõrĩrẽ gojadea

¹ Yu musãrẽ gojagu: “Īgũsã gajerã Jesúre bũremurãrẽ niyeru sĩburi neeõrĩrẽ masĩsiamama. Irasirigu irire gojanemobea”, ãrĩ gũñãa. ² Yu, gajerãrẽ musã iritamuduarire masĩsiãa. Irasirigu usuyari merã Macedonia nikũ marãrẽ ãsũ ãrĩ werebu: “Si bojorire Corinto marã Acaya nikũgue ããrĩrã, gajerã Jesúre bũremurãrẽ boporãrẽ iritamudũasiamama”, ãrĩbu. Irire pãrã, wãrã Macedonia nikũ marãde musã irirosũ usuyari merã ĩgũsãrẽ iritamudũama. ³ Yu Macedonia nikũ marãrẽ: “Corinto marã niyeru sĩrãkuma”, ãrĩderosũta waamakũ gããmea. Irasirigu iri niyeru

mũsã sĩdũarire yũ mũsã pũrogue ejaburi dupuyuro neõ odosiaburo, ãrĩgũ, Tĩtosãrẽ iriua. ⁴ Yũ Macedonia nikũ marã merã mũsã pũrogue ejagũ, mũsã sĩdũarire neõ odobirimakũ ãgũ, gũyasĩrĩbokoa. Yũ ãgũsãrẽ: “Corinto marã boporãrẽ sĩrãkuma”, ãrĩdero pũru mũsã sĩbirimakũ ãgũ, gũyasĩrĩbokoa. Mũsãde irasũta gũyasĩrĩbokoa. ⁵ Irasirigũ: “Yũ mũsã pũrogue ejaburo dupuyuro Tĩtosãrẽ iriupũrorigũra”, ãrĩ gũñãa. ãgũsã irogue ejarã, mũsãrẽ iritamurãkuma mũsã: “Sĩrãkoa”, ãrĩdeare iri odoburo, ãrĩrã. Irasirirã gũa mũsã pũrogue ejamakũ, gũa mũsãrẽ sĩdorero marĩrõ mũsã gajerãrẽ sĩdũarire bũro iritamudũari merã, neõ odosiarãkoa.

⁶ Ire gũñaka! Mĩrĩ yeri otedi, mĩrĩgã dũka seagũkumi. Wãri yeri otedi, wãri dũka seagũkumi. Iri irirosũ marĩ boporãrẽ mĩrõgã sĩmakũ, Marĩpu marĩrẽ mĩrõgã sĩgũkumi. Wãro marĩ sĩmakũ, wãro sĩgũkumi. ⁷ Irasirirã mũsã: “Õõpã sĩgũra”, ãrĩ gũñaderosũta sĩka! “Sĩdũabirikerepũru, yure sĩdorema. Irasirigũ sĩgũkoa”, ãrĩ gũñarõ marĩrõ sĩka! Marĩpu, ɯsũyari merã sĩrãrẽ maĩmi. ⁸ ããrĩpereri õãrĩrẽ mũsãrẽ sĩmasĩmi mũsã gããmerĩrẽ opapeokõãburo, gajerãdere mũsã opari merã õãrõ iritamunĩkõãburo, ãrĩgũ. ⁹ Marĩpuya werenĩrĩ gojadea pũgue irire ãsũ ãrĩ gojasũdero ããrĩbũ: Õãgũ boporãrẽ wãro sĩmi. ãgũsãrẽ õãrõ iritamurĩ neõ perebirikoa.✧

¹⁰ Marĩpu, oterimasũrẽ oteri koyere ãgũ oteburire opamakũ yãmi. Oterimasũ irire otedero pũru, Marĩpu ãgũ otedea dũkakũmakũ yãmi masaka

✧ 9:9 Sal 112.9

baaburire. Irire irirosũ musãrẽ ããrĩpereri musã boporãrẽ sĩburire opamakũ irigũkumi. Irire sĩdero pũũ, musã opadero nemorõ musã boporãrẽ sĩnemoburire opamakũ irigũkumi. ¹¹ Marĩpu musãrẽ ããrĩpereri õãrĩrẽ opamakũ irigũkumi gajerãrẽ wáro sĩburo, ãrĩgũ. Irasirirã gũa iri niyerure musã neõdeare marĩyarã boporãrẽ sĩmakũ iãrã, Marĩpũre usũyari sĩrãkuma. ¹² Musã ãgũsãrẽ iritamurã, ãgũsã gããmerĩ direta sĩrã meta yáa. Marĩpũre: “Õãtaria, mũ ãgũsãrẽ gũare sĩmakũ iriri”, ãrĩ, usũyari sĩmakũ yáa. ¹³ Musã ãgũsãrẽ iritamumakũ iãrã: “Corinto marã Cristoyare õãrõ yáma. Gũare wáro sĩrã, gajerãdere õãrõ sĩma”, ãrĩrãkuma. Irasirirã Marĩpũre bũro usũyari sĩrãkuma. ¹⁴ ãgũ musãrẽ õãrõ iritamurĩrẽ masĩrãkuma. Irasirirã musãrẽ bũro maĩrĩ merã musãya ããrĩburire ãgũrẽ sërẽbosarãkuma. ¹⁵ Marĩpu Jesucristo merã marĩrẽ õãtariro iridi ããrĩmĩ. ãgũ irasũ irideare marĩ werenĩrĩ merã weredũarã, werepeomasĩna máa. Irasirirã ãgũrẽ: “Õãtaria mũ”, ãrĩ, usũyari sĩa.

10

Pablo ãgũ Jesús buedoregũ pídi ããrĩrĩrẽ gojadea

¹ Yũ Pablo musãrẽ gaji weregũra. Ire weregũ, Cristo turiro marĩrõ bopoñarĩ merã werederosũta musãrẽ weredũáa. Surãyeri musã pũro ããrĩrã, yũre ãsũ ãrĩñurã: “Marĩ merã ããrĩgũ, turabi ubu ããrĩgũ irirosũ marĩrẽ weremi. Gajerogue ããrĩgũ, marĩrẽ bũro turari merã were gojami”, ãrĩñurã. ² Irasirigũ musãrẽ ãsũ ãrĩ werea. Yũ musã pũrogue ejamakũ, yũre turaro merã weremakũ iribirikõãka! Gajerã

mʉsã watopegue ããrĩrã gʉare: “I ùmʉ marã irirosũ ìgʉsã gããmerĩ direta irirã yáma”, ãrĩñurã. Irasũ ãrĩrãrẽ turaro doreri merã weregʉra. ³ Gʉa i ùmʉgue ããrĩkererã, gʉare ìaturirãrẽ wererã, i ùmʉ marã irirosũ iribea. ⁴ I ùmʉ marã ìgʉsã turaro merã ìgʉsãrẽ ìaturirãrẽ tarinʉgãmurã werema. Gʉa gapʉ Marĩpʉ doreri merã ìgʉsãrẽ werea, ìgʉyare ãrĩgatori merã gũñarĩrẽ: “Diaye ããrĩbea”, ãrĩ masĩburo, ãrĩrã. ⁵ Iri doreri merã Marĩpʉyare: “Diaye ããrĩbea”, ãrĩrãrẽ diayema ããrĩrĩrẽ masĩmakũ irimasĩa. “Masĩtaria”, ãrĩ gũñarãrẽ ããrĩpereri ìgʉsã gajerãrẽ Marĩpʉre masĩbirimakũ iririre pirimakũ irimasĩa. Iri doreri merã ããrĩpereri ìgʉsã gããmerõ gũñarĩrẽ pirimakũ irimasĩa, Cristo gapʉre gũña, ìgʉ gããmerĩ direta iriburo, ãrĩrã. ⁶ Mʉsã: “Ìgʉ dorerire tarinʉgãbirikoa”, ãrĩdero pʉrʉ, iri dorerire tarinʉgãgũnorẽ gʉa wajamoãmasĩa.

⁷ Mʉsã gajerãrẽ ìãrã, ìgʉsã iririkuri direta ìãrã yáa. ìgʉsã gũñarĩ gapʉre neõ ìãmasĩbea. “Cristoyagʉ ããrã”, ãrĩgũno gʉadere: “Cristoyarã ããrĩma”, ãrĩ masĩdorea. ⁸ Yʉ mʉsãrẽ: “Marĩ Opʉ gʉare ìgʉyare buedoregʉ pími”, ãrĩ werekeregʉ, irire gʉyasĩrĩbea. Gʉare irasũ buedoregʉ, mʉsãrẽ iritamudoregʉ pími. Mʉsãrẽ poyanorẽdoregʉ meta pími. ⁹ Yʉ mʉsãrẽ gojagʉ, yʉ gojari merã gʉkamakũ iridʉagʉ meta yáa. ¹⁰ Surãyeri mʉsã watopegue ããrĩrã ãsũ ãrĩma: “Pablo marĩrẽ gojagʉ, bʉro turari merã doremi. Irasirikeregʉ, marĩ merã ããrĩgũ, turabi ubu ããrĩgũ irirosũ marĩrẽ weremi”, ãrĩma. ¹¹ Irire irasũ ãrĩgũnorẽ ãsũ ãrĩ weregʉra: “Gʉa gajerogue ããrĩrã, mʉsãrẽ: ‘Ãsũ irirãra’, ãrĩ gojaderosũta mʉsã pʉrogue ejarã, irire irirãkoa”.

12 Surāyeri musā watopegue āārīrā īgūsā basi: “Marī gapu ōārō masīa, gajerā nemorō āārā”, āī gāme wereníma. Irasū āī wereníkererā, masībema. Gua gapu īgūsā irirosū gua basi gua iririre neō wereníñabea. 13 Irasirirā gua musārē wererā, Marīpu guare buedoregu pídea direta werea. Gajerārē īgū pídeare irirā meta yáa. Īgūta guare pími musādere buedoregu. 14 Irasirirā, īgū guare buedoregu píderosūta musārē Cristoya ōārī kerere buerorirā ejabu. Irogue musārē buerā ejarā, īgū guare dorederosūta iribu. 15 Īgū guare buedoregu píderosūta iririre wererā, keoro werea. Gajerā iririre: “Gua iriri āārā”, neō āībea. Musārē buerā, musārē Cristore buremunemomakū gāāmea. Musā buremunemomakū īārā, Marīpu guare dorederosūta irirā, gajerā musā pūroque āārīrādere buerākoa Cristore buremuburo, āīrā. 16 Pupu yoarogue marārē Marīpu Jesucristo merā masakare tauri kerere pémerārē buerā waarākoa. Gajerā iri kerere buederoguere buerā waa: “Gua bueri gapure pérā, Jesucristore buremunugāma”, āīrā meta yáa.

17 Marīpuya werenírī gojadea pūgue āsū āī gojasūdero āārībú: “Neō sugu: ‘Gajerā nemorō masīgū āārā’, āībirikōāburo. Irasū āīrōno irigu marī Opu gapure: ‘Turatarigu āārīsīā, marīrē ōātariro iridi āārīmí’, āīburo”, āī gojasūdero āārībú. 18 Sugū īgū basi: “Ōārō yáa”, āī werenírī waja máa. Marī Opu: “Ōārō yámi”, āī īāsūgū gapu diayeta ōārō irigu āārīmi.

Pablo ārīgatori merã buerimasãyamarẽ gojadea

¹ Daporare musãrẽ mérõgã yaamarẽ ārĩmoãmagũ irirosũ were gojagura. Yũ irasũ ārĩ gojarire gariborero marĩõ buemakũ gããmekoa. ² Marĩpu musãrẽ maĩrõsũta yude bũro maĩa. Musã yũ magõ irirosũ aãrã. Cristo musã marãpu aãrĩbu irirosũ aãrĩmi. Irasirigu, yũ magõ gajerã ũma merã neõ ñerõ iribeo sugureta marãpukamakũ gããmegũ irirosũ, yũ musãrẽ Cristoyarã dita aãrĩmakũ gããmea. ³ Irasũ gããmekeregu: “Evare iripoegue waaderosũ ĩgũsãdere waabokoa”, ārĩ gũñarikua. Wãtĩ, pĩrũ irirosũ deyoa, ĩgũ masĩrĩ merã ārĩgatomakũ pẽgo, Marĩpu dorerire tarinũgãdeo aãrĩmó. ĩgũ iriderosũ gajerã musãrẽ ārĩgatomakũ pẽrã, musã gũñarĩgue Cristoya direta musã iriduarire piribokoa. ⁴ Musã asũ yãa. Gajerã musã puo ārīgatori merã buerã ejamakũ, ĩgũsã buerire õãrõ pẽsuyua. ĩgũsã Jesũyamarẽ, Oãgũ deyomarĩgũ musã bokatĩrĩneãdiyamarẽ, Marĩpu Jesús merã masakare tauri kerere guã musãrẽ buedea irirosũ ĩgũsã buebirikerepuũ, ĩgũsã buerire pé bũremua. ⁵ ĩgũsã musãrẽ buerã: “Guã gajerã Jesús buedoregu pĩnerã nemorõ masĩa”, ārĩ pẽñakuma. Yũ gapu: “Jesús yũre ĩgũyare buedoregu pĩmi. Irasirirã yũre masĩtarinũgãbema”, ārĩ pẽñãa. ⁶ Yũ õãrõ wererimasũ irirosũ werebirikeregu, Marĩpu werenĩrĩrẽ õãrõ masĩa. Yũ masĩrĩrẽ, aãrĩpereri yũ ĩgũyare iriri merã musãrẽ masĩmakũ iribu.

⁷ Yũ musãrẽ Marĩpu Jesús merã masakare tauri kerere buegu: “Niyeru sĩa!” neõ ārĩ sērẽbiribu. Ubu aãrĩgũ irirosũ moã wajata baabu, musãrẽ

Marĩpuyare õãrõ masĩburo, ãrĩgũ. ¿Yu irasiridea õãberi? ¿Naásũ gũñarĩ? ⁸ Gajerã Jesúre bũremurĩ buri marã yure niyeru sĩma musãrẽ bueburo, ãrĩrã. Ìgũsã sĩrĩrẽ ñeãbu musãrẽ iritamubu. Irire ñeãgũ, Ìgũsãya niyerure emawãgãgũ irirosũ péñabu. ⁹ Musã merã ããrĩgũ, gajino yu gããmerĩrẽ opapeobirikeregu, musãrẽ niyeru neõ sërëbiribu. Marĩyarã Macedonia nikũ marã yu gããmerĩnorẽ ãĩjama. Irasirigu musãrẽ: “Niyeru sĩka!” neõ ãrĩ garibobiribu. Puruguedere musãrẽ neõ garibobirikoa. ¹⁰ “Cristo weregu, diayeta weredi ããrĩmĩ”, ãrĩ masĩa. Ìgũ diaye werederosũta yude musãrẽ niyeru sërëbirideare diayeta werea. Neõ sugu ããrĩperero Acaya nikũgue ããrĩgãno i musãrẽ yu sërëbirideare wererire: “Diaye werebemi”, ãrĩmasĩbirikumi. ¹¹ Musãrẽ yu sërëbirideare wererire pérã, ¿naásũ gũñarĩ musã? “Pablo guare maĩbirisĩa, irasũ ãrĩ weremi”, ¿ãrĩ gũñarĩ? ããrĩbea. Musãrẽ maĩa. Marĩpu irire masĩmi.

¹² Irasirigu yu musãrẽ irinugãderosũta iriwãgãnikõãgura. “Gajerã Jesús buedoregu pĩnerã nemorõ masĩa”, ãrĩgatorã musãrẽ bueri waja niyeru wajatadũama. Guu gapu Ìgũsã irirosũ wajatadũabea. Irasirirã Ìgũsã: “Guude Pablosã irirosũta yáa”, neõ ãrĩmasĩbema. ¹³ “Jesús buedoregu pĩnerã ããrã”, ãrĩrã, ãrĩgatorã yáma. “Diayeta Jesús buedoregu pĩnerã ããrĩma”, ãrĩ gũñamakũ iridũarã ããrĩsĩa, masakare ãrĩgatoma. ¹⁴ Yu gapu Ìgũsã irasirimakũ Ìãkeregu: “¿Nasirimurã irire irasũ yári?” ãrĩ gũñabea. Wãtëa opu Satanáde Marĩpũre wereboegu irirosũ deyoami masaka Ìgũ ãrĩgatorire: “Diayeta ããrã”, ãrĩ gũñamakũ iridũagu.

15 Irasirirã ārĩgatori merã buerimasã wãtirẽ moãboerã ĩgũ irirosũ yáma. Ñerã ãārĩkererã, ĩgũsã irigatori merã masakare: “Marĩpũre moãboerã ãārĩma, õãrõ yáma”, ārĩ gũñamakũ iridũama. Daporare masaka ĩgũsãrẽ: “Õãrã ãārĩma”, ārĩ gũñakerepũru, pũrũguere ãārĩpereri ĩgũsã ñerõ iridea waja bũro wajamoãsũrãkuma.

Pablo, ĩgũ ñerõ tarideare gojadea

16 Dupaturi mũsãrẽ ire were gojagũra. Neõ sugũ yũre: “Niãrĩmasũ ãārĩmi”, ārĩ gũñabirikõõka! Irasũ ārĩ gũñarã: “Niãrĩmasũ irirosũ werenĩburo”, ārĩka! Irasirigũ mérõgã yũ basi werenĩgũra. 17 Yũ irasũ werenĩgũ, niãrĩmasũ irirosũ werenĩgũ yáa. Marĩ Opũ yũre: “Irire wereka!” ārĩbirimi. 18 Wãrã masaka i ãmũma direta gũñakererã, ĩgũsã iririre: “Õãrõ yáa”, ãrĩma. Yũde ĩgũsã irirosũ mũsãrẽ yũ õãrõ iririre weregũra. 19 Mũsã basi: “Masĩtaria”, ārĩkererã, niãrĩmasã irirosũ werenĩrã bueri gapũre gariborero marĩõ péa. ¿Nasirirã ĩgũsãrẽ õãrõ péri? 20 ĩgũsãrẽ moãboerãrẽ dorerosũ mũsãrẽ bũro dorekerepũru, ārĩgatori merã mũsãyare ãĩakerepũru, mũsãrẽ oparã irirosũ dorerã ĩgũsã gããmerĩ direta gũñakerepũru, mũsãrẽ: “Ubu ãārĩrã ãārĩma”, ārĩ ĩãbéokerepũru, mũsãrẽ gũyasĩrĩmakũ iridũarã mũsãya wayupãrãrĩrẽ pákerepũru, ãārĩpereri ĩgũsã irasiririre gariborebirikoa mũsã. 21 Mũsãrẽ irasirirã, ñerõ irirã yáma. Gũa gapũ ĩgũsã irirosũ mũsãrẽ neõ irasiribiribokoa.

Yũ ĩgũsã irirosũ mũsãrẽ ñerõ iribirikeregũ, niãrĩmasũ ĩgũ iririre: “Õãrõ yáa”, ārĩ werenĩgũ irirosũ mũsãrẽ ãsũ ārĩ weregũra. 22 ĩgũsã: “Hebreo

masaka aãrã”, aĩma. Yude hebreo masakuta aãrã. “Israel bumarã aãrã”, aĩma. Yude Israel bumuta aãrã. Īgũsã: “Abraham parãmerã aãrã”, aĩma. Yude Abraham parãmita aãrã. ²³ Īgũsã: “Cristore moãboerã aãrã”, aĩma. Yu tamerã Īgũsã nemorõ Cristore moãboegu aãrã. Īgũyare õãrõ yáa. Yu basi niãrĩmasũ irirosũ werenĩkeregũ, yũ õãrõ iririre ãsũ aĩ werenemogũra. Yu Cristoyare irigũ, Īgũsã nemorõ moãtarinũgãbũ. Cristoya kerere wereri waja Īgũsã nemorõ peresugue biadobosũbũ. Īgũsã nemorõ tãrãsũbũ. Wári masaka yũre wẽjẽboyama. Irasirigũ mérõgã merã taribũ yũ boaboderore. ²⁴ Su mojõmagora judío masaka yũre ñeãma. Īgũsã yũre ñeãrikũ, treinta y nueve gora tãrãnama. ²⁵ Urea gajerã yũre ñeã, yuku merã páma. Suñarõ masaka ãtãyeri merã yũre deama. Urea doóriduparu merã mirĩbũ. Suñarõ mirĩgũ, sunũ, su ñami taboa majĩ weka wádiyaguere bá payaníbũ. ²⁶ Yu wári makãrĩguere buegorenagũ waanabũ. Yu buegorenamakũ, goetaribũ. Diarigue yũ mirĩĩ, yũre yajari, yaa nikũ marã judío masaka, judío masaka aãrĩmerãde yũre ñerõ iridũari, makãrĩgue, masaka marĩrõgue yũre wẽjẽdũari, wádiyague mirĩboama goetaribũ. “Mu merãmarã aãrã”, aĩrĩgatorãde yũre ñerõ irima goetarima. ²⁷ Cristoya kerere weregu, bũro moã wajata baabu. Irasũ moãgũ, ñerõ taribũ. Wujã pũrĩkerepũrũ, irasũ moãnĩkõãbũ. Gajipoere uaboabũ. Ñemesibubũ. Gajipoere baabiritaunokõãbũ. Gajipoere bũro yusamakũ, gajĩ surĩ sãñanemoburi marĩbũ.

²⁸ Irasũ aãrĩmakũ ãmarikũ Jesúre bũremurĩ buri marãrẽ aãrĩpererogue aãrĩrãrẽ gũñarikũa.

29 Irasirigu sugu gũñaturabi ããrĩmakũ ããgũ, yu basi gũñaturabi irirosũ péñáa. Jesúre b̄remugũrẽ ñerõ irimakũ irirã merã gua, Jesúre b̄remugũrẽ guyasĩrĩsãa. 30 Musãrẽ yaamarẽ werenemogũ, yu turabi ããrĩrĩrẽ masĩburo, ãrĩgũ, yure waadeare weregura. 31 Marĩ Opu Jesús Pagu, yu musãrẽ ãrĩgatori marĩrõ merã yaamarẽ wererire masĩmi. Ìgũrẽta: “Turatarigu ããrã”, ãrĩ, usuyari síníkõãrõ gããmea. 32 Yu Damascogue ããrĩmakũ, iro marã opu Areta wãikugũ dokamu yure ñeãduadi ããrãdimi. Yure ñeãduagu, iri makã turogue ìgũsã ùtã majĩrĩ merã weadea sãrĩrõma disip̄orikũ surarare koredoredi ããrĩmĩ. 33 Yu merãmarã gapu puui wãri puui merã iri sãrĩrõ ããrĩrĩ gobegue yure yótaudijuma. Irasirigu, ìgũsã iritamurĩ merã yure ñerõ iriduarãrẽ duriwãgãkõãbũ.

12

Pablo kërõ irirosũ ìgũ ããdeare gojadea

1 Marĩ basi: “Õãrõ masĩa”, ãrĩ werenígorenarĩ wajamarĩkerepũrũ, marĩ Opu Jesús kërõ irirosũ yure ìmudeare, ìgũ yure masĩmakũ irideare werenemogura. 2 Yu Cristore b̄remunugãdero pũrũ, Marĩpũ yure ãmugasigue ìgũ ããrĩrõgue ãĩmurĩãmi. Irogue ãĩmurĩaderõ pũrũ, catorce bojorigora taria. Yu dupũ merã, o yu yujupũrã merãta iroguere waagũ waakuyo, masĩbirikoa. Marĩpũ dita masĩmi. 3-4 I gapure masĩa. Yure irogue ãĩmurĩagu, paraíso wãikurogue ãĩmurĩjami. Yu dupũ merã, o yu yujupũrã merãta yure irogue ãĩagu, ãĩagukumi, masĩbirikoa. Marĩpũ suguta irire masĩmi. Yu irogue ããrĩgũ, ìgũ masaka iripoegue neõ masĩbirideare

werenírĩrẽ pébũ. Iri, ìgũ neõ sugũ masakũre weredoreri meta ããrĩbũ. ⁵ Iroguere ìgũ yũre ãĩmũĩadeare gũyasĩrĩrĩ marĩrõ musãrẽ weremasĩa. Yaama gapũre weregũ, gũyasĩrĩboko. Irasirigũ yũ turabi ããrĩrĩ diretta werenemogũra. ⁶ Yũ basi yaamarẽ weredũamakũ, yũ werenírĩ diaye ããrĩboko. Niãrĩmasũ werenírĩ irirosũ ããrĩbiriboko. Yaamarẽ weremasĩkeregũ, werebirikoa musã yũre: “Gajerã nemorõ õãmi”, ãrĩ gũñabirikõãburo, ãrĩgũ. Yũ iririkũrire ããdero pũrũ, yũ bueri gapũre pédero pũrũ, musã yũre: “Õãgorami”, ãrĩ gũñamakũ gããmea.

⁷ Marĩpũ yũre ãmudea õãtaribũ. Yũ irire gũñagũ: “Gajerã nemorõ masĩa”, ãrĩ gũñabokuyo. Marĩpũ gapũ irire gũñabirikõãburo, ãrĩgũ, wãtẽa opũ Satanás yaa dupũre pũrĩrikũmakũ iririre kãmutabiridi ããrĩmĩ. Iri pũrĩrĩ poraru ñajãrõsũ pũrĩa. ⁸ Ærea yũ marĩ Opũre: “Yũre i pũrĩrĩrẽ tauka!” ãrĩ sãrẽadibũ. ⁹ Ìgũ gapũ yũre ãsũ ãrĩmi: “Mũrẽ maĩsĩa, õãrõ iritamugũra. Yũ mũrẽ iritamurĩ neõ perebirikoa. ‘Turabea’, ãrĩ gũñagũnorẽ yũ turari merã õãrõ iritamua gajerã yũ turarire masĩnemoburo, ãrĩgũ”, ãrĩmi. Irasirigũ yũ turabi ããrĩrĩrẽ usũyari merã weregũkoka Cristo ìgũ turari merã yũre õãrõ iritamunĩkõãburo, ãrĩgũ. ¹⁰ Irasirigũ Cristoyagũ yũ ããrĩrĩ waja pũrĩrĩ merã turabi ããrĩsĩa, usũyari merã irire bokatĩũa. Gajerã yũre ñerõ werenĩkerepũrũ, yũ gããmerĩrẽ opabirikeregũ, gajerã yũre ñerõ irikerepũrũ, yũre ñerõ waakerepũrũ, usũyari merã irire bokatĩũa. ãsũ ããrã. Yũ, turari opabirimakũ, Cristo gapũ yũre ìgũ turarire opamakũ yãmi ñerõ taririre bokatĩũburo, ãrĩgũ. Irasirigũ usũyãa.

*Pablo Corinto marãrẽ Jesúre b̄remurãrẽ ãgũ
gũñarik̄urire gojadea*

¹¹ Ȳu basi yaamarẽ werenígũ: “Niãrĩmasũ irirosũ werenígũ iribũ”, ãrĩ gũñáa. M̄sã gap̄u ȳure irasir-
imakũ iribũ. M̄sã yaamarẽ õãrõ werenímakũ,
õãgorabokuyo. M̄sã ȳure õãrõ wereníbirikerep̄urũ,
“Ubu ããrĩgũ ããrĩmi”, ãrĩkerep̄urũ: “Jesús buedoregũ
pínerã ããrã”, ãrĩgatorã ȳu nemorõ ããrĩbema. ¹² Ȳu
m̄sã p̄uro ããrĩgũ, m̄sãrẽ b̄uro iritamud̄uri merã,
wári Marĩp̄u turari merã iririre iri ãmubũ,
diayeta Jesús buedoregũ pídi ããrĩrẽ masĩburo, ãrĩgũ.

¹³ Gajerã Jesúre b̄remurĩ buri marãrẽ, m̄sãdere
s̄urosũ iribũ. Yaa ããrĩburire m̄sãrẽ niyeru wa-
jaseabiribũ. M̄sã péñamakũ, ¿iri m̄sãrẽ ñegorari?
Iri m̄sãrẽ ñemakũ, m̄sãrẽ: “Irire kãtika!” ãrĩ s̄erẽa.

¹⁴ Pea m̄sã p̄urogue ejasiabũ. Daporare
dupaturi ȳu irogue waaburire ãmugũ yáa.
Irogue ejagũ, m̄sãrẽ: “Niyeru ȳure s̄ika!” ãrĩ
s̄erẽbirikoa. M̄sãyare gããmebea. Cristoya gap̄ure
m̄sã irit̄yanemomakũ gããmea. Ásũ ããrã.
Pagusãmarã ãgũsã p̄urãrẽ masũrã, ãgũsã gããmerĩrẽ
s̄ĩma. P̄urã gap̄u pagusãmarãrẽ ãgũsã gããmerĩrẽ
s̄ĩbema. ¹⁵ Irasirigũ m̄sãrẽ ȳu p̄urã irirosũ ããrĩrãrẽ
iritamugũ ããrĩpereri ȳu oparire s̄ĩmakũ õãrokoa.
M̄sãya ããrĩburire, ããrĩpereri ȳu turari merã m̄sãrẽ
b̄uro iritamud̄akoa. M̄sãrẽ ȳu b̄uro maĩkerep̄urũ:
“Ãgũsã gap̄u ȳure s̄irũgã maĩma”, ãrĩ gũñáa.

¹⁶ Surãyeri m̄sã watopegue ããrĩrã, ȳu m̄sãrẽ
s̄erẽbirideare masĩkererã, ãsũ ãrĩma: “Ḡuare
s̄erẽbirikeregũ, ãrĩgatori merã ḡuayare ãĩadi ããrĩmĩ”,
ãrĩma. ¹⁷ ¿M̄sã p̄urogue ȳu iriunerã ãrĩgatori merã
m̄sãyare ȳure ãĩriyuri? M̄sã masĩkoa. Neõ gajino

mʉsāyare āñibirinerā āñĩmá. ¹⁸ Irinugue Titore mʉsā pʉrogue waadorebʉ. Gajigʉ marĩyagure ĩgũ merā iriubʉ. Tito mʉsā merā āñĩgũ, ¿gajino mʉsāyare āñĩgatori merā āñĩrĩ? Mʉsā masĩkoa. Neõ āñibiridi āñĩmĩ. ĩgũ yʉ irirosũta mʉsārē iritamudʉagʉ āñĩmĩ.

¹⁹ Gajipoe irirā, yʉ mʉsārē gojarire buerā: “Pablosā ĩgũsāyamarē wereri merā gʉare: ‘Õāgorama ĩgũsā’, āñĩ gũñadorerā yáma”, āñĩ gũñabokoa. Āñĩbea. Gʉa Cristoyarā āārā. Irasirirā Marĩpʉ ĩũrõ mʉsārē diayeta werea. Yaarā yʉ maĩrā, āñĩpereri gʉa iriri merā mʉsārē iritamudʉáa Cristoyare iritʉyanemoburo, āñĩrā. ²⁰ Yʉ mʉsārē gũñarikʉa. Gajipoe irirā, yʉ mʉsā pʉrogue ejamakũ, yʉ gāāmerõsũ iribiribokoa. Irasirigʉ yʉde mʉsā gāāmerõsũ iribiribokoa. Gajipoe irirā gāme guaseorikʉrā, gajerārē ĩāturirikʉrā, mata guarikʉrā, mʉsāya āñĩburi direta gũñarikʉrā, gajerārē ñerõ kere wererikʉrā, ñerõ āñĩ werewʉarikʉrā, “Gajerā nemorõ āārā”, āñĩ weregorenarā, mʉsā nerērõgue noó mʉsā gāāmerõ iririkʉrā āñĩbokoa. Gajipoe irigʉ irasũ āñĩrārē bokajabokoa, āñĩgũ, irasũ āñĩ gũñarikʉa. ²¹ Irasirigʉ yʉ mʉsā pʉrogue dupaturi ejamakũ, Marĩpʉ mʉsā ñerõ iririkʉri waja yʉre gʉyasĩũrõ tarimakũ iribokumi. Wārā mʉsā iro dupuyurogue gũñarĩgue ñerĩ opadeare, ũma nome merā, nome ũma merā ñerõ irideare, mʉsā noó gāāmerõ gʉyasĩũrĩ ñerĩ irideare piridʉaro marĩrõ iriwāgāmakũ ĩāgũ, bʉro bʉjawereri merā oregʉkoa.

Pablo: “Āsū irika!” āri ōādoretūnudea

¹ Dapora y_u m_usā p_uroque waarí merā urea waarokoa. Irasirig_u m_usārē: “Marīp_uya werenīrī gojadea pūgue gojaderosūta āārīpererire iriro gāāmea”, āri werea. Iri pūgue āsū āri gojasūdero āārībú: “Pērā, o urerā sug_u űerō irideare iānerā oparāguere weresārō gāāmea”, āri gojasūdero āārībú. ² Iro dupuyuro y_u m_usā p_uroque āārīgú, m_usā āārīpererā péurogue űerō irirārē: “Wajamoāgura”, āri weresiabu. P_uru ejag_u, m_usārē irireta wereb_u doja. Daporadere yoarogue āārīkereg_u, gopeyaro merā irireta were gojāa doja. Mérōgā p_uru m_usā p_uro dupaturi waagú, y_u werederosūta űerō irirārē diayeta wajamoāgura pama. ³ Y_u irasirimakū iārā, ire masīrākoa. Y_u m_usārē Cristo y_ure gūñarī sīrī merā werea. Cristo turabi āārībemi. Īgū turari merā m_usā watopegue űerō irirārē wajamoāgakumi, Īgūsā űerō iririre piriburo, ārīgū. ⁴ Diayeta āārā. Īgū turari opabi irirosū curusague pábiatūsū, boadi āārīmí. Irasū boakereg_u, daporare Marīp_u turari merā okami. G_uade Īgū āārīderosūta turamerā āārā. Irasū āārīkererā, Cristoyarā āārīsīā, Marīp_uya turari merā okāa Īgū turari merā m_usārē iritamumurā.

⁵ Irasirirā m_usā basi: “¿Diayeta Jesucristore piriro marīrō b_uremurī y_u?” āri gūñaka! Diayeta m_usā Jesucristoyarā āārīmakū, Īgū m_usā merā āārīmi. ⁶ Diayeta g_ua Jesucristoyarā, Īgū buedoreg_u pīnerā āārīrīrē m_usārē masīmakū gāāmea. ⁷ Irasirirā űerō iribirikōāburo, ārīrā, Marīp_ure m_usāya āārīburire sērēbosāa. Īgūrē sērērā, m_usārē g_uare ōārō gūñadorerā meta yāa.

Musã guare õãrõ gãñabirikerepuru, Marĩpũre musãya ããrĩburire sãrẽbosáa, ãgũ iritamurĩ merã õãrĩre iriburo, ãrĩrã. ⁸ Marĩpũya, diayema ããrĩrĩ ããrã. Irasirirã ãgũyare keoro irimakũ ããrã, gũa musãrẽ: “Irire iribirikõãka!” neõ ãrĩmasĩbirikoa. “Diayema direta irika!” ãrĩmasĩa. ⁹ Irasirirã musã õãrõ yũjũpũrãkũturari merã ãgũyare keoro irimakũ õãgoráa. Gũa burõ turari merã musãrẽ: “Ãsũ gapũ irika!” ãrĩmasĩmerã, usũyáa. Marĩpũre musãya ããrĩburire sãrẽbosanikõãa, ãgũyare keoro iriwãgãnemoburo, ãrĩrã. ¹⁰ Irasirigũ musã pũrogue waaburi dupuyuro musãrẽ i pũrẽ gojáa. Irogue ejagũ, musã ñerõ iririre piribirimakũ ããgũ, marĩ Opũ yũre dorederosũta musãrẽ burõ wajamoãgũra. Pirimakũ ããgũ, wajamoãbirikoa. Marĩ Opũ yũre: “Yũ dorerosũta irika!” ãrĩ pími. Musã ãgũrẽ burẽmunemomakũ gããmegũ, irasirimi. Musãrẽ poyanorẽmakũ gããmebemi.

¹¹ Yaará, iropãta ããrã yũ musãrẽ gojari. Õãrõ ããrĩrikũka! Yũ dorerire õãrõ yũjũpũrãkũri merã keoro irika! Guaseori marĩrõ suro merã gãña, õãrõ siuñajãrĩ merã ããrĩka! Irasirigũ Marĩpũ musãrẽ siuñajãrĩ sãgũ, musãrẽ maãgũ musã merã ããrĩgũkumi. ¹² Musã merãmarã merã õãrõ merã gãme mojõ ñeãka! ¹³ ããrĩpererã Jesũre burẽmurã õõgue ããrĩrã musãrẽ õãdorema.

¹⁴ Marĩ Opũ Jesucristo marĩrẽ õãrõ iritamugũ, Marĩpũ marĩrẽ maãgũ, Õãgũ deyomarĩgũ marĩ merã ããrĩnĩgũ ããrĩpererã musã merã õãrõ ããrĩburo. Iropãta ããrã.
Pablo

Marĩpuya Kerere Wereri Turi New Testament in Siriano

copyright © 2009 Wycliffe Bible Translators, Inc.

Language: Siriano

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Siriano

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 22 Feb 2024 from source files
dated 29 Jan 2022
1a0774e8-d152-5929-891b-95e0d2238786